

Folkehøjskolit pillugit Inatsisartut inatsisaat

Siunertaq nassuiaatillu

§ 1. Folkehøjskolit ilinniartitsinermik nalinginnaasumik peroriartuutaasumik, ilinniartunut neqerooruteqartarput, pingaartitatut nammineq toqqagaq aallaavigalugu tamatigoortumik, nalinginnaasumik demokratiskiusumillu inunnik qaammarsaanissaq siunertaralugu. Folkehøjskolit nalinginnaasumik peroriartuutaasumik atuartitsinerup iluani atuartitsissutit ataasiakkaat imaluunniit atuartitsissutit ataatsimoortut salliutissinnaavaat.

Imm. 2. Folkehøjskolit ilinniartunik pisinnaatitsilerfusumik ilinniartitsinermik neqerooruteqarsinnaapput, mernguernartulerinerup pilersitsiffiusumillu sammisaqarnerup iluani, ilinniartut nalinginnaasumik, atuartitsissutitut tunngasutigut inuttullu piginnaasaasa annertusarnissaat siunertaralugu.

Imm. 3. Folkehøjskolit ilinniartitsineq misilitsinnissaq siunertaralugu ilinniartitsinermik ilaqarteq neqeroorutigisinnaavaat, malittarisassat atuuttut naapertorlugit meeqqat atuarfianni inaarutaasumik naliliinerit ilaannut peqataanissaq, ilinniakkani allani ilinnialissutaasinnaasumik ilinniartinneqarnissaq, inuutissarsiutinik tunngaviusumik ilinniartitsinerup iluani ilinniartinneqarnissaq aamma ilinniarnertuunngorniarfimmil atuartitsissutit ataasiakkaanik ilinniartinneqarnissaq siunertaralugit. Ilinniartitsinerup ilinniakkami pineqartumi nalinginnaasumik piumasaqaataasut nallersorsinnaassavai.

Imm. 4. Folkehøjskolit ilinniartitsinermik imm. 3-mi taaneqartumik aallartitsinerat pisassaaq ilinniarfimmik imaluunniit oqartussaasumik nalinginnaasumik ilinniakkamik pineqartumik neqerooruteqartartuusumik suleqatigiinnissamik isumaqatigiissuteqarneq tunngavigalugu. Isumaqatigiissut Naalakkersuisunit akuerineqassaaq.

Imm. 5. Naalakkersuisut imm. 1 – 4-mi aalajangersakkat pillugit erseqinnerusumik malittarisassaliorsinnaapput.

§ 2. Naalakkersuisut folkehøjskolip siulersuisuisa inassuteqareernerisigut akuerisinnaavaat, folkehøjskolip ilinniartitsinermik tamarmiusumik ilaanilluunniit ilinniarfinni sumiiffinniluunniit allani kommunalbestyrelsit, suliffeqarfiit ilinniarfiilluunniit allat suleqatigalugit ingerlatsinissaa. Naalakkersuisut tamanna pillugu erseqqinnerusunik malittarisassaliorsinnaapput.

Ilinniartoqalersarneq aamma ilinniarfimmiissimanermut uppersarsaatit

§ 3. Folkehøjskolit ilinniartut folkehøjskolertussatut ilinniartunngortittarpaat. Naalakkersuisut folkehøjskolit oqaaseqaateqareernerisigut ilinniartunik qinnuteqartitsinermi ilinniartunngortitsinermilu periusissat pillugit malittarisassanik aalajangersaasinnaapput, tamatumunnga ilanngullugit ilinniartunngornissamatulleriarinissamullu piumasaqaatit.

§ 4. Ilinniartut § 1, imm. 2-mi aamma 3-mi aalajangersakkat naapertorlugit ilinnialersut, ilinniakkap pineqartup iluani inatsisit qaqugukkulluunniit atuuttut naapertorlugit ilinniartinneqassapput. Naalakkersuisut Folkehøjskolimiinnissap naammassineqarnissaa Namminersorlutik Oqartussanit tapiiffigineqartoq pillugu malittarisassanik aalajangersaasinnaapput.

Imm. 2. Ilinniartut § 1, imm. 2-mi aamma 3-mi aalajangersakkat naapertorlugit ilinnialersut, ilinniakkap pineqartup iluani misilitsinnissamut pisinnaatitaaffeqarput. Naalakkersuisut tamanna pillugu erseqqinnerusunik aalajangersagaliorsinnaapput.

§ 5. Folkehøjskolit ilinniartunut § 1 naapertorlugu ilinniarnerminnik naammassillugu ingerlatsisimasunut tamanut uppersaasiissapput. Naalakkersuisut uppersaasatit imarisassaat, ilusissaat atuutsilernerilu pillugit erseqqinnerusunik malittarisassaliussapput.

Ilinniartunik ilitsersuineq tapersersuinerlu

§ 6. Folkehøjskolit ilinniartut tapersersorneqarnissaannik, ilitsersorneqarnissaannik siunnersorneqarnissaannillu folkehøjskolimiinnerminnik naammassinninnissaannik siunertaqartumik neqeroorfigissavaat.

Imm. 2. Folkehøjskolit ilinniartut ataasiakkaarlugit ilinniakkamik inuutissarsiummillu toqqaanissaq pillugu siunnersorneqarlutillu ilitsersorneqarnissaannik neqeroorfigissavaat. Naalakkersuisut ilinniartunik ataasiakkaarluni siunnersuinissaq ilitsersuinissarlugu pillugit erseqqinnerusunik malittarisassaliorsinnaapput.

§ 7. Folkehøjskolit ilinniartunut pisariaqartitsisunut immikkut aqqissuussatut ilinniartitsinermik neqerooruteqarsinnaapput. Naalakkersuisut tamanna pillugu erseqqinnerusunik malittarisassaliorsinnaapput.

Aqutsisut

§ 8. Folkehøjskolit suliffeqarfittut imminnut pigisutut ingerlanneqarput, qullersaaffigalugillu aqunneqarnerat siulersuisunit 5-7-inik ilaasortaqtartunik isumagineqarluni, taakku ilinniartuup ingerlannera qullersaaffigalugu akisussaaffigaat, tamatumunnga ilanngullugit suliamut aningaasaqarnermullu tunngasutigut ingerlassat aamma ilinniartuup ingerlassai pillugit aalajangersakkat maleruarneqarnissaat. Siulersuisut aningaasartuutissatut isertitassatullu missingersersuutit akuersissutigisarpaat, tamatumunnga ilanngullugit forstaderip inassuteqareerneratigut aningaasaqarnikkut sillimmatit agguaanerat taakkualu atorneqarnissaannut tunngavissat. Siulersuisut naatsorsuutit atsiussavaat.

Imm. 2. Siulersuisut toqqarneqassapput malittarisassat, folkehøjskolit ataasiakkaat ileqqoreqqusaanni aalajangersarneqartut naapertorlugit ukiunilu sisamani atuutissallutik.

Imm. 3. Siulersuisunut ilaasortat ataatsimoorlutik folkehøjskolinik ingerlatsineq, ilinniartitsinernik inerisaaneq, pitsaassutisimik qularnaarineq, aqutsineq, aqqissugaaneq aningaasaqarnerlu pillugit ilisimasaqartuussapput, aningaasanut missingersuutit naatsorsuutillu nalilernissaat ilanngullugit,

taamaattoq tak. § 23, imm. 3. Folkehøjskolit, siulersuisunik toqqaanerup kinguninnguagut kikkut siulersuisunut toqqaagaasimanersut pillugit Naalakkersuisunut ilisimatitsissuteqassapput.

Imm. 4. Folkehøjskolip forständeria siulersuisunut allattaavoq, siulersuisullu ataatsimiinnerini taaseqataasinnaatitaanani peqataasarluni.

§ 9. Siulersuisut folkehøjskolip ingerlassaanut piffissamilu ungasinnerusumi ineriartornissaanut tunaartarisassanik aalajangersaassapput. Siulersuisut ingerlassassanut pilersaarutit aalajangersartassavaat, akisussaaffigalugulu taakku siunertamut naapertuuttuunissaat, tak. § 1.

Imm. 2. Siulersuisut folkehøjskolip forständeria atorfnitsillugulu soraarsittarpaat. Siulersuisut forständerip ingerlatsinissaa pillugu erseqqinnerusunik aalajangersagaliorsinnaapput, forständerilu pisinnaatissinnaallugu, pisinnaatitaaffinnik siulersuisuniittunik isumaginninnissamut.

Imm. 3. Siulersuisut folkehøjskolip ileqqoreqqusaa aamma siulersuisut ingerlassinnerminni suleriaasissaat suliarissavaat.

Imm. 4. Siulersuisut ilinniartitsineq § 1, imm. 2-mi aamma 3-mi eqqaaneqartoq pillugu ilinniartitsinermut pilersarusiussapput, Naalakkersuisunit akuerineqartussamik. Tamannali atuutinngilaq Naalakkersuisut ilinniagaq pineqartoq pillugu ilinniartitsinermut pilersaarummik akuersereersimappata. Naalakkersuisut tamanna pillugu malittarisassanik aalajangersaasinnaapput, tamatumunnga ilanngullugit akuersissummik atorunnaarsitsinermut tunngasut.

Imm. 5. Siulersuisut ataatsimik amerlanernilluunniit ilinniartitsinermut ataatsimiititaliorsinnaapput, tamatumunnga ilanngullugu ilinniartitsinermut ataatsimiititaliaagallartunik pilersitsineq, ilinniakkat suliamut tunngatillugu imarisaat pitsaassutsikkullu qaffasissusiat pillugit siulersuisunut siunnersuinissaq siunertaralugu.

§ 10. Forständeri ulluinnarni ilinniartitsinikkut aamma perorsaanikkut akisussaasuvoq, folkehøjskolimilu allaffissornikkut aningaasaqarnikkullu aqutsineq isumagisaralugu. Forständerip qularnaassavai:

- 1) malittarisassat atuuttut naapertorlugit ilinniartitsinerup ingerlanneqarnissaa
- 2) pissutsit ilinniartitsinermut tunngasut isumannaatsuunissaat
- 3) missingersersuutit siulersuisunit akuersissutigineqartut eqquutsinnissaat
- 4) ilinniarfiup allatigut ingerlassaasa siulersuisut aalajangiineri tunaartarisassiaallu naapertorlugit pinissaat.

Imm. 2. Forständeri ilinniarfiup ukiumi aggersumi ingerlassassai pillugit pilersaarutissamik (ukiumoortumik pilersaarut) siunnersuusiussaaq.

Imm. 3. Forständerip folkehøjskolip sulisui allat atorfnitsillugillu soraarsittarpai, ilinniarfiup pisortai allat ilanngullugit.

Imm. 4. Forständerip aningaasartuutissatut isertitassatullu missingersersuut naatsorsuutillu siulersuisunit akuerisassatut inassuteqaatigissavai naatsorsuutillu atsiussallugit.

Folkehøjskolinik akuersineq

§ 11. Folkehøjskolit Inatsisartut inatsisaat manna naapertorlugu tapiiffigineqassagunik Naalakkersuisunit akuerisaassapput tapiissuteqartarnermullu piumasaqaatit piviusunngortissimassallugit, tak. §§ 13-16.

Imm. 2. Naalakkersuisut folkehøjskolit akuerisinnaavaat:

- 1) ileqqoreqqusaat Naalakkersuisunit akuerineqarsimappat
- 2) folkehøjskoli ininik naapertuuttunik atortussanillu pisariaqartunik peqarpat.
- 3) folkehøjskolimi siulersuisut § 8, imm. 3-mi piumasaqaatitut taaneqartut eqqortissavaat.

Imm. 3. Folkehøjskolip ileqqoreqqusaa makkunannga imaqaassaaq:

- 1) Suliffeqarfiup imminut pigisup aqqa.
- 2) Kommuni suliffeqarfiup imminut pigisup najugaqarfia.
- 3) Suliffeqarfiup imminut pigisup siunertaa.
- 4) Suliffeqarfiup imminut pigisup pilersinneqarnermini pigisaasa nalillit aamma imminerisamik aningaasaataasa annertussusaat.
- 5) Pilersitsisuusumik allanilluunniit immikkut pisinnaatitaaffiliisimanerit imaluunniit iluaqutissaqartitsinerit.
- 6) Siulersuisut katitigaanerat amerlassusissaallu, qanoq toqqarneqartarnissaat aamma piffissaq atuuffiat, tak. § 8, imm. 2 aamma 3.
- 7) Naatsorsuutit saqqummiunnissaannut malittarisassat.
- 8) Sinneqartoorutit qanoq atorneqarnissaat.

§ 12. Naalakkersuisut akuersissut tunuartissinnaavaat, folkehøjskolip § 11, imm. 2-mi piumasaqaatit eqquutsissinnaajunnaarpagit. Naalakkersuisut aammattaaq akuersissummik tunuartitsisinnaapput, folkehøjskolip ilinniartitsinera allatigulluunniit pissutsit § 1-imi aalajangersakkanut erseqqissumik akerliusutut nalilernerqarpata.

Imm. 2. Imm. 1-imi naggatit aappaat naapertorlugu akuersissummik tunuartitsineq taamaallaat pisinnaavoq iliuusissat sunnuteqannginnerusut misilinneqareersimappata.

Tapiissutit

§ 13. Inatsisartut Aningaasanut Inatsisaanni aalajangersarneqartut iluanni Naalakkersuisut, folkehøjskolinut akuerisaasunut tapiissuteqartassapput piumasaqaatit makkua aallaavigalugit:

- 1) Folkehøjskolit pisortaat ilinniartitsisuilu akissaateqartinneqassapput Naalakkersuisut isumaqatigiissuteqarfigisinnaasaasa iluanni atorfiit assingusut pillugit aalajangersakkat naapertorlugit. Atorfininnermi atugassarititaasut allat allakkatigut isumaqatigiissutigineqassapput.
- 2) Folkehøjskolip Naalakkersuisunut uppersarsassavaa folkehøjskolip forstanderiata ilinniartitsisualu naammaginartumik soraarnerussutisiassaqaarnissaasa qularnaarneqarnerat.
- 3) Siulersuisut ukiumoortumik nalunaarussiaq, naatsorsuutininik kukkunerisukkanik aamma aningaasartuutissat isertitassallu missingersersuusiorderannik ilaqartoq Naalakkersuisunut nassiutissavaat.
- 4) Folkehøjskolip ingerlassassanik pilersaarutai Naalakkersuisunit akuerisaassapput.

§ 14. Ilinniartunut § 1, imm. 1-imi pineqartunut Naalakkersuisut Inatsisartut Aningaasanut Inatsisaanni aalajangersarneqartut iluanni folkehøjskolinut tapiissuteqartassapput,

- 1) minnerpaamik sapaatip-akunnerini 36-ni tapiiffigineqarsinnaasumik ilinniartitsisoqarpat,
- 2) ilinniartitsineq annerpaamik marloriarluni folkehøjskolernertut aaqqissuussaappat,
- 3) folkehøjskolernerit tamarmik minnerpaamik sapaatip-akunnerinik 13-inik sivilissuseqarpata, aamma

4) tapiiffigineqarsinnaasumik ilinniartitsinermik ingerlatsinerup iluani ukioq naallugu ilinniartut minnerpaamik 20-uppata.

Imm. 2. § 1, imm. 1 naapertorlugu ukioq naallugu ilinniartuq tassaavoq ukiup ataatsip ingerlanerani sapaatip-akunnerini 36-ni ilinniartorisaq ataaseq.

Imm. 3. Tapiissutit naatsorsorneqassapput ukioq naallugu ilinniartut sapaatip-akunnerisalu ilinniartitsiffusut tapiiffigineqarsinnaasut amerlassusaat aallaavigalugit.

Imm. 4. Naalakkersuisut tapiissutit naatsorsornerat, tunniunneqartarnerat aqutarinerallu pillugit malittarisassanik aalajangersaasinnaapput, tamatumunnga ilanngullugit ukioq naallugu ilinniartut ikinneruneranni sapaatillu-akunnerisa ilinniartitsiffittut naammassiat ikinneruneranni tapiissutit ikilisinneqarsinnaaner at pillugu aalajangersakkat.

§ 15. Ilinniartunut § 1, imm. 2-mi pineqartunut Naalakkersuisut folkehøjskolinut tapiissuteqartassapput, ilinniartitsineq folkehøjskolernertut aaqqissuunneqarpat, minnerpaamik sapaatip-akunnerini 36-ni tapiiffigineqarsinnaasumik ilinniartitsisoqarpat aamma Naalakkersuisut folkehøjskolit ilinniartitsinermut pilersaarusiaat tigusiappatigit, tak. § 9, imm. 4. Tapiissutit ilinniartitsinerup suussusia, imarisai, annertussusia ilinniartullu amerlassusaat naapertorlugit Naalakkersuisunit aalajangerneqassapput.

Imm. 2. Ilinniartitsinermut pilersaarutit minnerpaamik makku pillugit allaaserisat imarissavaat:

1) Ilinniartitsinerup siunertaa

2) Ilinniartitsinerup ilusaa, tamatumunnga ilanngullugit sapaatip-akunnikkaartumik ilinniartitsinerup aamma folkehøjskolimiinnerup sivissusaat ilinniartitsinermullu naleqqiullugu ilinniartut amerlassusaat,

§ 16. Ilinniartunut § 1, imm. 3-mi pineqartunut tapiisoqassaaq, ilinniartitsineq folkehøjskolernertut aaqqissuunneqarput, ilinniakkamullu pineqartumut ilinniartitsinermut pilersaarut naapertorlugu ingerlanneqarpat, tak. § 9, imm. 4 aamma § 15, imm. 2. Tapiissutit aalajangerneqassapput, ilinniarfimmi il.il. nalinginnaasumik ilinniartitsinermik pineqartumik neqerooruteqartartumi, ilinniakkap ingerlanneqaruni akigiumaagaa assigalugu.

Imm. 2. Naalakkersuisut folkehøjskolinut taxameteri malillugu tapiissutit naatsorsornissaat, tunniunniissaat aqutarinissaallu pillugit malittarisassanik aalajangersaasinnaapput, taakkununga ilanngullugit ukioq naallugu ilinniartut ikinneruneranni sapaatillu-akunnerisa ilinniartitsiffittut naammassiat ikinneruneranni tapiissutit ikilisinneqarsinnaaner at pillugu aalajangersakkat.

§ 17. Folkehøjskolit forstanderiisa ilinniartitsisusalu ilinniartuarnissaat siunertaralugu pikkorissarnernut Naalakkersuisut tapiissuteqarsinnaapput.

Imm. 2. Forstanderit ilinniartitsisullu ilinniaqqinnerminni piffissap ilaa tamakkiisumilluunniit sulinggifteqartut akissarsiaqartinnerinut Naalakkersuisut tapiissuteqarsinnaapput.

Imm. 3. Tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassapput.

Imm. 4. Naalakkersuisut pissutsit imm. 1-3-mi taaneqartut pillugit erseqqinnerusunik aalajangersagaliorsinnaapput.

§ 18. Folkehøjskolit siunertamik iluanni, Naalakkersuisut tapiissutaasa isertitallu allat ataatsimut isigalugit qanoq atornissaat namminneq aalajangissavaat. Taamaattoq piumasaavoq ilinniartitsineq

tapiiffigineqartoq malittarisassat atuuttut ilinniartullu tapiiffigineqartut amerlassusaat naapertorlugit ingerlanneqassasoq.

Imm. 2. Folkehøjskolerit aningaasat atunngisat ukiup naatsorsuuseriffiup tullianut nuussinnaavaat.

§ 19. Naalakkersuisut tapiissutit unitsikkallarsinnaavaat atorunnaarsillugilluunniit, tamatumunngalu ilanngullugu tapiissutaareersimasut uterteqqusinnaallugit, tapiissutisinissamut piumasarineqartut eqquutinneqanngippata aamma ilinniartitsineq ilinniartitsinermut pilersaarut malillugu ingerlanneqanngippat. Tapiissutit utertinnissaat atorunnaarsinnissaalluunniit pillugit Naalakkersuisut malittarisassaliorsinnaapput.

Ilinniagaqarnersiutit

§ 20. Ilinniartut § 1-imi pineqartut tapiiffigineqarsinnaasumillu sivikinnerpaamik sapaatip-akunnerini 13-imi folkehøjskolimiittut ilinniagaqarnersiutit pillugit nalunaarummi malittarisassat naapertorlugit ilinniagaqarnersiaqassapput. Taamaattoq ilinniagaqarnersiaqarneq taamaallaat pisinnaavoq, ilinniartup ilinniarnermi aallartinnerani, unitsitsinerani naammassineranilu angalanerminut akiliunneqarneratut aamma nerisaqarnermut ineqarnermullu akiliutissat ilanngaatereerlugit ikiorsiissutisiatut.

Imm. 2. Folkehøjskolerit akuerisaasut siulersuisuinit inassuteqaateqartoqareerneratigut, Naalakkersuisut folkehøjskolimi sivikinnerpaamik sapaatip-akunnerini 13-inik sivilsussuseqartumik ilinniartut, § 1, imm. 1-imi pineqartut, sapaatip-akunneranut akiliutigisartagassaat aalajangertassavaat.

Imm. 3. Kalaallit Nunaanni Kommuneqarfiit Kattuffiat siunersioreerlugu Naalakkersuisut aalajangertassavaat imm. 2-mi ilinniartup akiliutissaata akuerineqartup ilaa qanoq angitigisoq ilinniartumit namminermit akilernerqartassanersoq aammalu qanoq angitigisoq kommunimit najugaqarfigisaanit akilernerqartassanersoq, ilinniartunut § 1, imm. 1-imi pineqartunut atatillugu.

Nakkutilliineq

§ 21. Naalakkersuisut folkehøjskolinik nakkutilliissapput aammalu paasissutissanik tamanik nakkutilliinissamut atorineqartussanik piniarsinnaallutik. Paasissutissat pisariaqartinneqartunik tunniussinginnerup nassatarisinnaavaa tapiissutit uninngatinneqarnerat imaluunniit unitsinneqarnerat il.il. aqqutigalugit pineqaatissiisoqarnera.

Misiligaalluni ingerlatsineq

§ 22. Naalakkersuisut Inatsisartut peqqussutaanni aalajangersakkanik saneqqutsisinnaapput Inatsisartut peqqussutaanni pineqartut iluanni misiligaalluni suliaqarnissap siuarsarnissaa pisariaqartinneqarpat.

Atuuttuulersitsinermut, ikaarsaariarnermut atorunnaarsitsinermullu aalajangersakkat

§ 23. Inatsisartut inatsisaat atuutilissaaq 1. januar 2011, ilutigisaanillu atorunnaarsinneqarpoq folkehøjskolerit pillugit Inatsisartut peqqussutaat nr. 9, 21. maj 2002-meersoq. Malittarisassat Folkehøjskolerit pillugit Inatsisartut peqqussutaat nr. 9, 21. maj 2002-meersoq naapertorlugu aalajangersarneqartut

atuutissapput, malittarisassanik Inatsisartut inatsisaat manna allalluunniit naapertorlugit malittarisassalianik taarserneqarnissamik tungaanut.

Imm. 2. Folkehøjskolerit Inatsisartut peqqussutaat imm. 1-imi taaneqartoq naapertorlugu akuerineqartut akuerisaasutut isigineqarput. Taamaattorli folkehøjskolerit siulersuisuisa ileqqoreqqusat kingusinnerpaamik 1. marts 2011-mi Naalakkersuisunit akuerisassanngorlugit nassiutereersimassavaat.

Imm. 3. Siulersuisut Inatsisartut peqqussutaat imm. 1-imi taaneqartoq naapertorlugu toqqagaasimasut, piffissap toqqagaaffimmik naanissaanut ingerlaannassapput, tamatumalu kingorna siulersuisunit Inatsisartut inatsisaat manna naapertorlugu toqqagaasunit taarserneqassallutik.

Kalaallit Nunaanni Namminersorlutik Oqartussat, 18. november 2010

Kuupik Kleist

/

Mimi Karlsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut